

Awenochi den Mareniers Kazerne lo ta un fiesta pa recorda...

SENSACION DEL CARIBE MANO A MANO CU "THE STRANGERS" ..

Texto : Poets.

DEN AMBIENTE

** Awenochi den Mareniers Kazerne lo bay ta un anochi di recuerdo, na unda e dos bandanan cu a marca historia den nan epoca lo bay topa cu otro. Nos ta papiando aki di nada mas y menos Sensacion del Caribe y "The Strangers". E combinacion aki sin duda lo bay trese gratonan dushi awenochi den Mareniers Kazerne.

Dia 24 di april ultimo Sensacion del Caribe a cumpli 34 aña di existencia. Pa e motibo aki tambe nan ta den un gira di celebracion. Recientemente dia 25 di april nan a celebra nan 34 aña di existencia riba Isla di Oro den un tremendo fiesta hunto cu TIGO.

Awenochi e celebracion ta continua mano a mano cu "The Strangers". E fiesta aki ta priminti di

bay bira un exito grandi, ya cu "The Strangers" ketu bay ta gozando di un gran popularidad y nan fanaticonan ta sigui nan unda cu nan ta.

Sensacion del Caribe tambe ta conta cu un gran fanatico, kendenan nunca a bandona nan. Sensacion del Caribe tabata e orquesta mas popular aki na Aruba y tabata yena tur fiesta. E temponan ey ta henter un weekend tabata tin fiesta bailabel. For di diabierna te cu diadomingo Sensacion del Caribe tabata den paranda di fiesta y tur nan fiestan tabata goza di un yeno total. Awendia e fiestan aki ta haci hopi falta y ta masha propaganda mester haci pa haya un pipita di hende. Hopi di nos grandinan ta comenta cu tempo di nan tempo, nan a goza



** SENSACION DEL CARIBE..34 aña ketu bay duro duro..

mas cu e generacion di awendia.

Sensacion del Caribe tabata un di e agrupacion musical cu mas a trese hopi alegria y ambiente


na Aruba, mescos tambe den e parti juvenil tabata "The Strangers". Ta pa e motibo aki tambe e generacion di e epoca di Sensacion del Caribe y

"The Strangers" lo bay demostra na e generacion nobo aki, con nan tabata goza y ketu bay nan ta goza bay laga nan leuw...

GEORGE MARGARITHA TA LANSA UN BUNITA CD DI GOSPEL "TA DIOS A SINJA MI" ..



** Awenochi "The Strangers" lo bay explota Mareniers Kazerne..



** Siman pasa tabata na Aruba e joven cantante George Margaritha, kende a bishita DEN AMBIENTE durante e programa "Show di Poets" di tur diasabra na Cristal Fm. E bishita corto di George Margaritha na Aruba, ta enconexion cu lansamento di

su prome CD titula "Ta Dios A Sinja Mi".

E CD aki ta dedica completamente na cancionnan di gospel riba e ritmo di musica ranchera. Ta trata aki di 10 cancion den cual e joven cantante di apenas 13 aña ta expresa mensahenan spiritual

sumamente positivo. Riba e CD aki ta aparece "Ta Dios a sinja mi, Un bunita sonjo, Mi ta cuminda bo Maria, Ta Dios ta duna amor, Sigui Dios su ehempelnan, Ban gradici nos Dios, Grandi Bo Ta, Señor scucha mi voz, Muchanan sea alerta y e ultimo Ave Maria.

Por a compronde cu e CD aki ya ta un exito total na hermana isla Curacao. E acompañamento musical riba e CD aki a ser graba den studio na Venezuela pa Mariachi Perla de Mexico, mientras cu George Margaritha a graba su voz den Raimy's Sound Studio.

George Robert Margaritha a nace na Saba dia 8 di februari 1985 y a cuminsa canta cu su 4 aña. Dia 7 di oktober 1987 el a establece su mes na Curacao hunto cu su mayornan. Actualmente e ta den 6e klas di Sint Joris College. Su hobby nan ta canta y landa. El a comenta na DEN AMBIENTE cu semper ora su tata tabata toca guitarra, e tabata acompaña cu maraca. Su mensahe na e juventud ta como lo siguiente: "Obedece boso mayornan y respeta tur hende, hasi boso best na school y keda leu for di droga y maldad.

DEN AMBIENTE ta recomenda bo pa cumpra e bunita CD aki, cual ta obtable na tur nos disco barnan..